




JAMHUURIYADDA **SOMALILAND**

XEERKA XAKAMAYNTA HUBKA FUDUD



XEER LRI32/2010

GOLAHA WAKIILADA

HARGEYSA –SOMALILAND

REPUBLIC OF



SOMALILAND

THE PRESIDENT

REF. JSL/M/DM/249/2-182/092010

DATE 13/09/2010

Degreeto Madaxweyne No:72/092010

Dhaqan-galka Xeer Lr.39/2010 ee Xeerka Xakamaynta Hubka Fudud

Madaxweynaha Jamhuuriyadda Somaliland

- Markuu arkay: Ogolaanshaha Golaha Wakiiladda ee Xeer Lr. 39/2010
- Markuu Arkay: Qodobka 90aad ee Dastuurka JSL
- Markuu helay: Go'aanka golaha Wakiiladda JSL ee ku suntan GW/KF-12/494/2010 ee Xeerka Xakamaynta Hubka Fudud.
- Markuu Arkay: Qodobka 75aad ee dastuurka JSL.

Wuxuu soo saaray

Dhaqan-galka xeer Lr. 39/2010 ee xeerka Xakamaynta Hubka Fudud oo lagu baahin doono Faafinta rasmiga ah (Bulatiino Officiale).

Allaa Mahad Leh,

Axmed
Axmed Maxamed Silanyo

Madaxweynaha Jamhuuriyadda Somaliland



RL:38
RECEIVED
Hiboo
14/09/10



Ref: GW/KF-12/494/2010

Date: 09/08/10

Ujeedo: - Go'aanka Ansixinta Xeerka Xakamaynta Hubka Fudud (Xeer
(No.39/2010)

GOLAHA WAKIILADA JSL

- MARKUU ARKAY:** Qodobka 38^{aad}, faqradda 4aad xarafyada B&T & Qodobada 39^{aad}, 110^{aad}, 111^{aad}, iyo 112^{aad} ee Dastuurka iyo Qodobka 3^{aad} faqradiisa 11^{aad} ee Xeer Hoosaadka Golaha wakiiladda Jamhuuriyada Somaliland.
- MARKUU DERSAY:** Sharciga lambarkiisu yahay 70/95 ee 27/11/95 iyo Warqada dhaqangelintiisa ee **Lr. JSL/M/WA/222-038/1299** ee 17/12/1999 ee Madaxweynaha JSL Xakamaynta hubka iyo rasaasta dagaalka.
- MARKUU TIXGELIYEEY:** Xeerka nabadgalyada Guud ee Xeer **Lr.14/1963** Public order law.
- MARKUU OGAADAY:** Marxaladda lagu jiro,iyadoo dad shicib ahi ay hub iska sitaan suuqyadda magaalooyinka dhexdoooda si fududna wax isku yeeli karaan.
- MARKUU U CODEEYEEY:** Xeerka Xakamaynta Hubka fudud,**Kal-fadhigii 12^{aad} fadhigiisii 10^{aad} ee 09/08/2010** oo ay goob joog ahaayeen (47) Mudane oo ka mid ah Mudanayaasha **Golaha Wakiilada.**

WUXUU

Cod aqlabiyad ah (45 cod) oo gacan taag ah ku Ansixiyay Xeerka Xakamaynta Hubka Fudud ee (Xeer No. 39/2010), halka **hal (1) mudane** ka diiday, cid aamustayna aanay jirin,**Gudoomiyuhuna muu codayn** sida caadada ah.

C/risaag Siciid Ayaanle
Xoghayaha Guud ee Golaha Wakiilada

ALLAA MAHAD LEH

C/raxmaan Maxamed C/laahi(Ciro)
Gudoomiyaha Golaha Wakiilada JSL

BISMILAAHI RAXMAANI RAXIIM



GOLLAHA WAKILLADU

- Markuu Arkay: Qodobka 110aad, 111aad iyo 112aad ee Dastuurka JSL
- Markuu Arkay : Xeerka Maamulka Gobollada iyo Degmooyinka (Lr.23/2002)
- Markuu Arkay: Sharciga lambarkiisu yahay 70/95 ee 27/11/95 iyo warqada dhaqangelintiisa ee Lr. JSL/M/WA/222-038/1299 ee 17/12/1999 ee Madaxweynaha JSL Xakamaynta hubka iyo rasaasta dagaalka
- Markuu Arkay : Xeerka Nabadgelyada Guud ee Xeer. Lr. 14 ee sanadkii 1963 (Public Order Law).
- Markuu ogaaday: Marxallada lagu jiro iyadoo dad shicib ahi ay hub iska sitan suuqyada magaalooyinka dhexdooda si fududna wax isku yeeli karaan

WUXUU ANSIXIYEEY XEERKAN



Qodobka 1aad
Macnaha Erey Bixinta

Hubka Fudud: Waxaa loola jeedaa Hubka Fudud sida qoriga AK, Baastoolada iyo noocyada la midka ah.

Ruqsad : Waxaa loola jeedaa oggolaanshaha qoriga ama baastoolada la diiwaangeliyey.

Wasaarad : Waxaa loola jeedaa Wasaaradda Arrimaha Gudaha JSL

Wasiir : Waxaa loola jeedaa Wasiirka Wasaaradda Arrimaha Gudaha

Xafiis : Waxaa loola jeedaa Xafiiska Diiwaangelinta Hubka Fudud ee Gobolka

Diiwaangelin: Waxaa loola jeedaa Xafiiska Diiwaangelinta Hubka Fudud.

Difaac : Waxaa loola jeedaa difaaca qofka nafiisa iyo hantidiisa si xeerka waafaqsan

Hub Hanti Dawlo: Waxaa loola jeedaa Hubka waa-weyn ee ku cad sharci Lr 70/95 oo ah Xeerka Xakamaynta Hubka iyo Rasaasta Dagaalka.

Walxaha qarxa : Waxaa loola jeedaa Bamamka, Miinoyinka Gumacyada, iwm., ee qarxa

Ajinebi : Waxaa loola jeedaa qofka aan u dhalan Somaliland ee haysta waraaqda degenaashaha rasmiga ah ama magan-gelyo siyaasadeed

QODOBKA 2AAD
Ujeeddooyinka Xeerka

Iyadoo lagu xakamaynayo, maamulayo, laguna diiwaangelinayo Hubka Fudud Ujeeddooyinka Xeerkan laga leeyahay waxaa ka mid ah in:

1. La xoojiyo xaq dastuuriga ah ee qofku u leeyahay inuu nabad u helo naftiisa iyo maalkiisa.
2. Laga hortago haysashada iyo lahaanshaha sharci darrada ah ee Hubka Fudud.
3. Ay dawladdu awood u yeelato inay bulshada ka qaaddo ama ka xerayso hubka sharci darrada ah.
4. Laga hortago ama la yareeyo dambiyada lagu galo Hubka Fudud.
5. La abuuro hab muuqda oo shaqaynaya oo lagu ilaaliyo Hubka Fudud.



QODOBKA 3AAD

Magaca Xeerka

Xeerkan waxaa loogu yeedhayaa Xeerka Xakamaynta Hubka Fudud.

QODOBKA 4AAD

Fasiraadda Xeerka

Xeerkan waxaa loo fasirayaa si waafaqsan Dastuurka, Shareecada Islaamka iyo Xeerarka kale ee Dalka

Qodobka 5aad

Xadka Addeegsiga Xeerka

Xeerkan waxaa lagaga dhaqmayaa dhammaan xuduudaha Jamhuuriyadda Somaliland

CUTUBKA LABAAD

DIIWAAN-GELINTA IYO RUQSAD SIINTA HUBKA FUDUD

QODOBKA 6AAD

Diiwaangelinta Hubka Fudud

1. Dhammaan Hubka Fudud ee qofka keliyi qaadan karo laguna talagalay difaaca naftiisa iyo hantidiisa sida qoriga "AK", Bastoolada iwm, iyo rasaastooda, waa in la diiwaangeliyaa.

QODOBKA 7AAD

Cidda U Igman Ruqsad Bixinta Iyo Diiwaan-gelinta

1. Diiwaan-gelinta hubka fudud ee uu jideeyay Xeerkan waxa u xilsaaran Wasaaradda Arrimaha Gudaha sida ku cad sharciga xakamaynta hubka iyo rasaasta dagaalka ee Xeer Lr. 70/1995.
2. Qaabka, midabka, qoraalka lagu muujinayo ruqsadda, ogolaanshaha daabacadda, cidda u igman saxeexa dhukmentiga iyo wixi la xidhiidha, waxa Xeer-Nidamiye aan xeerkan ka hor imanayn ku soo saaraya Wasiirka wasaaradda Arrimaha Gudaha.
3. Muwaadin kasta oo loo diiwaan-geliyo hubkiisa fudud waa inay Wasaaraddu siisaa warqadda ruqsadda oo leh lambr tirsi ah.

4. Waxa Xafiiska diiwaan-gelinta hubka fudud iyo ruqsad bixinta loo magacaabaya Mas'uul sare oo ku sifoobay daacadnimo iyo hawlkar, kaasi oo leh saxeexa ruqsadda, isaga oo hubinaya foomka muwaadiniintu soo codsatay in uu waafaqsan yahay xeerkan.



QODOBKA 8AAD

Ogolaanshaha Diiwaan-gelinta Hubka Fudud Ee Muwaadinka

1. Muwaadin kasta oo u dhashay Somaliland wuxuu xaq u leeyahay inuu haysto Hubka Fudud ee difaaca naftiisa iyo hantidiisa si xeerka waafaqsan, haddii uu u baahdo.
2. Qof kasta oo u haysta Hubka Fudud sifada ku xusan farqadda 1aad ee qodobkan waa inuu ka diiwaan geliyo xafiiska diiwaan-gelinta Hubka Fudud ee Gobolka uu degan yahay.
3. Ogolaanshuhu waa in uu ku salayasnadaa asbaab mucayin ah sida hanti iyo nafba

QODOBKA 9AAD

Ogolaanshaha Diiwaan-gelinta Hubka Fudud Ee Ajnabiga

1. Qof kasta oo ajnabi ah oo haysta sharciga deganaanshaha rasmiga ah ee Somaliland ama dalka ku jooga magangelyo siyaasadeed waa loo ogol yahay inuu haysto Hubka Fudud ee difaaca naftiisa iyo hantidiisa, si xeerka waafaqsan.
2. Qof kasta oo ajnabi ah oo Hubka Fudud u haysta sifada ku xusan farqadda 1aad ee qodobkan, wuxuu xaq u leeyahay in loo diiwaangeliyo lana siiyo ruqsada.

QODOBKA 10AAD

Muddada Dhammaadka Ruqsadda.

1. Muddada ogolaanshaha ruqsadda Hubka Fududi waa hal (1) sanno oo ka bilaabanta maalinta la bixiyey ruqsadda.
2. Qof kasta oo haysta ruqsadda Hubka Fudud waa inuu cusboonaysiiyaa ruqsaddiisa marka ay dhamaato halka sanno.
3. Qof kasta oo raba in loo cusboonaysiiyo ruqsaddiisa haysashada Hubka Fudud waa inuu u soo qortaa arjiga cusboonaysiinta ruqsadda hubka xafiiska diiwaan-gelinta Hubka Fudud ee gobolka uu deggan yahay 30 casho ka hor dhamaadka taariikhda ku xusan farqadda 1aad ee qodobkan.



4. Haddii arjiga cusboonaysiinta ruqsaddu dib uga dhaco muddada ku xusan farqadda 3aad ee qodobkan, waa inuu codsaduho dib u soo qortaa arji cusboonaysiinta, wasaaradduna u soo ogolaataa cusboonaysiinta ruqsadda.
5. Qofkasta oo haysta ruqsada Hubka Fudud waxa waajib ku ah inuu bixiyo cashuur sannadeed dhan 30,000 SI, Shilin/=

QODOBKA 11AAD

Muddada Diiwaan-gelinta La Oggolyahay

1. Muwaadinka kasta oo deggan Somaliland ama qof kasta oo ajanabi ah oo haysta sharciga daganaashaha rasmiga ah ee Somaliland ama magan-gelyo siyaasadeed la siiyey ee haysta Hubka Fudud, waxaa waajib ah inuu ka qaato W/Arrimaha Gudaha ogolaanshaha (ruqsadda) haysashada Hubka Fudud, iskana diiwaan-geliyo xarunta diiwaan-gelinta hubka ee gobolka/degmada uu deggan yahay muddo 12 bilood gudahood ah laga bilaabo maalinta xeerkan dhaqangalo.
2. Qof kasta oo haysta Hubka Fudud ee difaaca naftiisa iyo maalkiisa ee ku diiwan- gelin waaya muddada ku xusan farqadda 1aad ee qodobkan ah waxa laga qaadayaa tallaabo sharci oo waafaqsan Xeerka Ciqaabta Guud.

QODDOBKA 12AAD

Nooca ruqsadda iyo qoraalkeeda

1. Ruqsaddu waa Buug yar oo aan si fudud loo beddeli karin, kuna sawiran yahay nooca hubka lagu ogolaaday oo tirsi taxana ah leh.
2. Magaciisa oo afran iyo magaca hooyaddii
3. Meesha uu ku dhashay deganyahayna
4. Waxa lagu dhejiya sawirka mulkiilaha ogolaanshaha la siiyay
5. Lambarka Hubka fudud ee la ogolaaday noociisa (Qori/Baastoolad)

QODOBKA 13AAD

Diiwaanka Hubka Fudud

1. Diiwaanka Hubka Fudud ee xafiiska diiwaangelinta gobolka waa in la dhigaa goobta lagu kaydiyo dokumentiyada qarsoodiga ah ee xarunta gobolka.



2. Hubka Fudud ee la diiwaangeliyey waa in saddexdii (3) biloodba mar loo gudbiyo taliska Ciidanka Booliska gobolada.
3. Hub fudud ee kasta ee xafiiska Wasaaraddu diiwaangeliyo waa in lagu muujiyaa:-
 - a. Magaca mulkiilaha hubka(qoriga/ bistooladda) oo saddexan.
 - b. Lambarka(S/No.) hubka(qoriga/bastooladda).
 - c. Lambarka Ruqsadda(ogolaanshaha).
 - d. Lambarka warqadda cashuurta lagu bixiyey.
 - e. Malinta Ruqsadda la bixiyey.
 - f. Tariikhda Ruqsaddu dhacayso.

QODDOBKA 14AAD

Meelaha ka reeban in lala gallo.

Waxa reeban in lala galo hubka fudud ee ruqsada leh goobaha ay ka mid yihiin: -

- a. Qasriga Madaxtooyadda
- b. Xarunta Baarlamaanka
- c. Maxkamaddaha dalka JSL
- d. Goobahaleh xasaanad dibloomaasiyadeed
- e. Xeryaha Ciidmadda
- f. Hay'addaha caalamiga ah
- g. Goobaha Caafimaadka
- h. Goobaha Waxbarashadda
- i. Iyo Goobaha Cibaadada

QODDOBKA 15AAD

Cidda ka Reebban Ruqsadda Hubka Fudud

1. Waxaa reebban in la siiyo ogolaanshaha(ruqsada) qaadashada Hubka Fudud haddii qofku ku sifoobo ama uu yahay:-

- a. Qofka da'diisu ka yar tahay 18 sanno.
- b. Qofka sharcigu(Maxkamad) ka qaaday awoodda takrifalka.
- c. Qofka uu ku caddaaday dembi ciqaabeed la xidhiidha isticmaalka hubka ama fal argagixisnimo.
- d. Qof ay ku caddaatay dhaqan xumo sida, isticmaalka ama ka ganacsiga maandooriyaha, kufsi iwm.
- e. Qof ay ku socoto eedayn inuu galay xadgudub ciqaabeed, inta ay socoto eedayntiisu.



2. Cidda ruqsadda Hubka Fudud bixinaysaa waa inay kaalmaysataa wax kast oo muuyinaya in cidda ruqsadda la siinayaa aanay ku sifoobin arrimaha ku xusan farqadda 1aad ee qodobkan sida, marag, caddaymo iwm., si looga taxadiro in ruqsadda la siiyo cid aan ku habboonayn.

QODOBKA 16AAD

Noocyada Hubka Fudud ee ka Mamnuuca Dadweynaha

1. Qofna looma ogola inuu u isitimaalo difaaca naftiisa iyo hantidiisaba hubka uu ka midka yahay :-
 - a. Dhamaan walxaha qarxa sida: Bamamka, Miinooyinka, Qumucyada iwm.
 - b. Dhammaan wixii kimiko ah (Dareere, Budo, Adke ama Gaas) ee loo adeegsan karo qarax ama fal wax lagu dilo.
 - c. Dhammaan hubka uu adeegsigooda reebay xeerka xakamaynta hubka iyo rasaasta dagaalka (Xeer.Lr.70/95).
2. Hubka ku xusan farqadda 1aad ee qodobkan xarafka(a) ee xeerkan lama ogola haysashadiisa, kaydiintiisa iyo isticmaalkiisa midna, Qof kasta oo lagu qabtona waxaa laga qaadaa talaabo sharci oo waafaqsan xeerka ciqaabta guud.

QODOBKA 17AAD

Isticmaalka Qalabka Qarxa Aamusiya (Silencer)

Waxaa reebban in loo isticmaalo Hubka Fudud ee ruqsadda loo haysto qalabka qarxa aamusiya ee loo yaqaano (Silencerka), lamana diiwaan-gelin karo.

QODOBKA 18AAD

Qiyaasta Hubka Difaaca loo Ogolyahay Ruqsadda

1. Tirada Hubka Fudud ee loo ogol yahay qofka rayidka ah in ruqsad loo siiyo loona diiwaangaliyo waa hal (1) ka mid ah noocyadiisa Hubka Fudud Sida: AK ama Baastoolad ee difaaca naftiisa iyo hantidiisa iyo rasaastooda oo aan ka badnayn mid (1) khasnad keliya.
2. Qofka rayidka ee ganacsadaha ah ee u baahan hub ka badan inta ku xaddidan farqadda 1aad ee qodobkan ee difaaca hantidiisa waa in loo diiwaangeliyaa ruqsaddana loo siiyaa, ka dib marka ay Wasaaraddu hubiso tirada hubka uu u baahan yahay.
3. Qofka haysta tiro hub fudud ah oo ka badan inta ku xusan farqadda 1aad ee qodobkan waa inuu ku wareejiyaa Wasaaradda Arrimaha Gudaha, Waxaana la siinaya magdhaw u dhigma qiimaha hubka.



QODOBKA 19AAD

Ilaalinta Nabadgelyada Shirkadaha Iyo Warshadaha Wax soo-saarka i.w.m

1. Waxa la abuurayaa shirkado gaar ah oo nabadgelyo (Private Security Companies) oo leh Xeer u gaara ah, oo iyaga iyo hubkooda iyo ciidankoodaba lagu dhaqo laguna diiwaangeliyo.
2. Shirkadaha waaweyn, Warshadaha wax soo saarka iyo Hay'adaha aan dawliga ahayn ee waddaniga ah, waxaa amniga hantidooda iyo shaqaalahoodaba ka mas'uul ah ciidamadda nabadgelyadda.
3. Haddii Shirkaddaha, Wershada iyo Hay'adaha ku xusan faqradda 2aad ee qodobkan ay u baahdaan ilaalo gaara waxay ka qaadanayaan ciidan ilaaliya shirkaddaha gaarka ah ee nabadgelyada marka ay oggolaansho ka helaan Wasaaradda Arrimaha Gudaha.

QODOBKA 20AAD

Ruqsadda Hubka ee Madaxda iyo Mas'uuliyiinta Dawladda

Mas'uuliyiinta sare ee Dawladda oo aanay ku jirin madaxda sare ee Ciidamadu, haddii ay u baahdaan Hubka Fudud ee difaaca naftooda ee ay Dawladdu leedahay, waxaa oggolaansho u siinaysa Wasaaradda Arrimaha Gudaha ama wakiilada Wasaaradda ee gobolada ay dagan yihiin.

CUTUBKA SADDEXAAD

LA WAREEGIDDA HUBKA FUDUD, QAYBIHIISA IYO RASAASTA

QODOBKA 21AAD

Hubka Iyo rasaata sharci-darrada ah ee La qabto

Dhammaan Hubka, qaybaha hubka (Xubnaha) iyo rasaasta aan ruqsadda loo haysan ee la qabto waa hanti dawladeed, qofkii lagu qabtana waxaa laga qaadayaa tallaabo sharci oo waafaqsan Xeerka Ciqaabta Guud ka dib marka oggolaansho laga helo Maxkamadda awoodda u leh.

QODOBKA 22AAD

La wareegidda Hubka Fudud iyo Rasaastooda Arrimo Nabadgelyada Guud Awgood

Haddii ay timaado baahi la xidhiidha duruufo nabadgelyo awgood, dawladu waxay awood u leedahay inay si ku meel gaadh ah ula wareegto dhammaan Hubka Fudud iyo rasaasta la diiwaangeliyey ruqsadana leh iyadoo u raacaysa sifo sharciga dalka waafaqsan.



QODOBKA 23AAD

Hubka Hantida Dawladeed ah

1. Nooc kasta oo ah hubka waa weyn ee xeerkan tilmaamayo, shacbiga waa ka mamnuuc haysashadiisa iyo isticmaalkiisuba, waxaana loo aqoonsan yahay hanti dawladeed, iyadoo la raacayo qodobka kowaad ee sharciga xakamaynta hubka iyo rasaasta dagaalka Lr.70/95 27/11/95.
2. Xeerkan isagoo tixraacaya qodobka 8aad ee xeerka xakamaynta hubka iyo rasaasta dagaalka Xeer Lr.70/95 ee 27/11/95, xarafiisa 2aad iyo 3aad, hubka qarxa ee dagaalka ee ku jira gacan ka duwan tan dawladda waa inay ku wareejiyaan Wasaaradda Gaashaandhiga ama Ciidanka Booliska, muddo lix (6) bilood gudahood ah, ka dib dhaqan-galka Xeerkan.

CUTUBKA AFRAAD

KEENISTA, DHOOFINTA, GANACSIGA IYO GUDBINTA HUBKA FUDUD

QODOBKA 24AAD

Keenista / dhoofinta Hubka Fudud, Qaybihiisa iyo Rasaastiisa

Marka laga reebo Dawladda Somaliland, qofna madhoofin karo, mana keeni karo Hubka Fudud, qaybaha hubka (components), rasaasta iyo qalabka loo adeegsado.

QODOBKA 25AAD

Ganacsiga, Ururinta iyo Dayactirka Hubka Fudud Iyo Rasaasta

1. Qofna kama ganacsan karo, ma ururin karo, mana dayactiri karo Hubka Fudud
2. Waxaa reebban gadidda iyo gudbinta Hubka Fudud si kasta iyo nooc kasta oo ay tahay ee u gudbaysa qofka caadiga ah (Private Person).
3. Warshadaha Shirkadaha iyo Hay'adaha Dawliga ah ee aan looga maaramayn hawlahooda Walxaha Qarxa iyo Kimikooyinka ku xusan Qodobka 15aad ee Xeerkan waxay Wasaaraddu u samaynaysaa Xeer-nidaamiye gaar ah oo lagu dhaqo isticmaalkooda.

QODOBKA 26AAD

Ciqaab

Wixii dambi ah ee ka dhasha ku xad-gudubka qodobada 23aad iyo 24aad ee xeerkan waxaa loo raacayaa sifo sharci ee waafaqsan Xeerka Ciqaabta Guud Jamhuriyadda Somaliland.



CUTUBKA SHANAAD
KAYDINTA IYO SIDASHADA HUBKA FUDUD IYO RASAASTA

QODOBKA 27AAD
Kaydinta Hubka Fudud Iyo Rasaastiisa

1. Qof kasta oo Ruqsad loo siiyey haysashada hubka fududi, waa inuu ka taxadiro meesha uu dhigayo hubkiisa, kana ilaaliyo caruurta iyo cid kasta oo loo ogolayn, kuna kaydiyo qol ama sanduuq u gaar ah oo uu furaha kalidii haysto si aan khasaare lama filaan ahi uga iman..
2. Ciqaabta ka dhalata wixii dayac ama taxaddar darro ah ee ka yimaadda arrimaha ku xusan farqadaha 1aad ee qodobkan waxaa loo raacayaa sifada sharci ee waafaqsan Xeerka Ciqaabta Guud ee JSL.

QODOBKA 28AAD
Sidashada Hubka Fudud

1. Qof kasta oo haysta ogolaanshaha(Ruqsadda) Hubka Fudud, looma oggola inuu si qaawan ugu dhex haysto ama ula dhex maro hubka ruqsadda loo siiyey suuqyada magaalooyinka dhexdooda ama dadweynaha dhexdiisa, waase loo oggol yahay inuu u qaato si asturan.
2. Uma bannaana Qofka Hubka Fudud ogolaanshaha(ruqsadda) loo siiyey in uu u adeegsado weerar ama cabsi gelin, ama uu cid kale u ogolaado inay u adeegsato weerar ama cabsi gelin.
3. Qofka ay ku caddaato in uu u adeegsaday Hubka Fudud ee ruqsadda loo siiyey falalka ku xusan farqadda 3aad ee qodobkan waxaa laga qaadayaa tallaabada sharci ee waafaqsan Xeerka Ciqaabta Guud ee JSL .
4. Hubka Fudud waxa haysan kara oo kaliya qofka ogolaanshaha(Ruqsadda) loo siiyey umana bannaana in uu cid kale ergiso u siiyo.

QODOBKA 29AAD
Hubka Fudud ee Gaboobay Iyo Dhalan- beddelidiisa

1. Haddii Hub fudud oo diiwaan-gashan ruqsadna leh uu gaboobo oo uu shaqayn waayo, waa in mulkiilaha hubku la socodsiiyaa xafiiskii marka hore laga diiwaan-geliyey hubka..
2. Marka ay cadaato in hubkaasi aanu lahayn isticmaal dambe waa loo bedalayaa ruqsadda haddii la yimaaddo hub fudud oo kale oo shaqaynaya, hubka gaboobayna wuxuu ku wareejinayaa Wasaaradda iyo wakiiladeeda si loo burburiyo.
3. Mulkiilaha looma oggola inuu Hubka Fudud ee ruqsadda loo siiyey dhalan-rog ku sameeyo



CUTUBKA LIXAAD

BEDDELAADDA, LA NOQOSHADA, LUMIDDA RUQSADDA HUBKA FUDUD IWM

QODOBKA 30AAD

Lumidda Iyo Baddelaadda Ruqsadda Hubka Fudud

1. Cid(qof) kasta oo ay ka lunto ama laga xado Ruqsad loo siiyey haysashada hub fudud, waa in uu sida ugu dhakhsaha badan ugu wargeliyaa Saldhiga Booliska ee ugu dhaw.
2. Qof kasta oo ruqsadda haysashada Hubka Fudud ee ka guura meeshii uu hubku uga diiwaangashanaa, waa in uu muddo bil gudaheed ah kaga diiwaangaliyaa Xafiiska Diiwaangelinta Hubka Fudud ee deegaanka cusub ee uu u guuray.
3. Haddii uu geeriyoodo qof haysta ruqsadda Hubka Fudud, waa in xubnaha qoyska qofka geeriyooday ay ku wargeliyaan xafiiska diiwaan-gelinta hub fudud 30 maalmood gudahood oo ka bilaamata maalinta dhimashada.
4. Qofka geeriyooday ee ku xusan farqadda 3aad ee qodobkan, waxaa ruqsaddiisa haysashada Hubka Fudud loo wareejinayaa qof mas'uul ah oo ka mid ah dadka dhaxalkiisa leh ama cid kale oo qofka dhintay sifo sharci ah ugu asteeyey, haddii ay jirto.
5. Qofka maxkamadi ka qaado awoodda tagrifalka hantidiisa ee lahaa ruqsadda Hubka Fudud oo diiwaangashan, waxaa ruqsada haysashada Hubka Fudud loo wareejinayaa qof mas'uul ah oo ka tirsan dadka dhaxalkiisa leh ama ciddii kale ee maxkamaddu u garato.

QODOBKA 31AAD

La Noqoshada Ruqsadda Iyo La Wareegidda Hubka Fudud ee Ruqsadda lagala Noqday

1. Diiwaangelinta iyo ruqsadda Hubka Fudud waxaa la tirtiri karaa marka:-
 - a. Ay caddaato in ruqsadda loo haysto si khilaafsan sifooyinka ku xusan qodobka 14aad ee Xeerkan.
 - b. Ay dhammaato muddada jiritaanka ruqsaddu ee aan la cusboonaysiin.
 - c. Uu dhaco ama uu dhamaado sharciga deganaanshaha rasmiga ah ee JSL oo la siiyey qof ajanabi ah oo leh ruqsadda haysashada Hubka Fudud.
 - d. Ay caddaato in hubka loo adeegsaday sifada ku xusan qodobka 11aad, farqaddiisa 4aad ee xeerkan.
 - e. Go'aanka kala noqoshada waxaa gaadhi kara oo keliya Wasaaradda Arrimaha Gudaha ama Maxkamadda awoodda u leh.
 - f. Wasiirka Arrimaha Guduhu, ka dib marka uu helo go'aanka tirtiridda ama kala noqoshada ruqsadda qof hore u haystay, wuxuu soo saarayaa digreeto Wasiir oo lagaga qaadayo ruqsadda qofkaasi.
 - g. Qofka ama cidda ruqsadda laga qaaday waa inay hubka ku wareejisaa wasaaradda 24 saacadood gudahood laga bilaabo marka ay soo baxdo digreetada Wasiirku.



QODOBKA 32AAD

Wareejinta Hubka Qofka Muwaadinka Ama Ajanabiga Ah ee Dalka Ka Guura

1. Qofka ajanabiga ah ee haysta ruqsada Hubka Fudud ee difaaca naftiisa iyo hantiisa ee Dalka ka Guura, wuxuu ku wareejinayaa hubka Ruqsada loo siiyey ee u diiwaan-gashanaa Wasaaradda Arrimaha Gudaha, wuxuuna noqonayaa Hanti Dawladeed.
2. Muwaadinka haysta ruqsada Hubka Fudud una guura dalka dibadiisa wuxuu hubkii ku wareejinayaa cid mas'uul ah oo sharcigu u ogol yahay oo ehel-kiisa ka mid ah ama ciddii kale ee mas'uul ah ee uu u garto.
3. Muwaadinka ku xusan farqadda 2aad ee qodobkan, waxaa kale oo u bannaan in hubkiisa uu ruqsadda u haysto ku wareejiyo Wasaaradda Arrimaha Gudaha, waxaana laga siinayaa magdhaw u dhigma qiimaha hubka, haddii uu sidaa codsado.

QODOBKA 33AAD

Ku Xadgudubka Xeerka

Guud ahaan wixii dambi ah ee ka dhasha ku xad-gudubka xeerkan waxaa loo raacayaa Xeerka Ciqaabta Guud JSL.

QODOBKA 34AAD

Nasakhaad Ama Laalis

Waxaa la laalay ama la nashakhay xeer ama sharci kasta oo ka soo horjeeda Xeerkan.

QODOBKA 35AAD

Xeerka Nidaamiye


Faahfaahinta xeerka xakamaynta Hubka Fudud waxaa xeer-nidaamiya ka soo saaraya Wasiirka Wasaaradda Arrimaha Gudaha.

QODOBKA 36AAD

Dhaqangal

Xeerkani wuxuu dhaqangelayaa marka ay Golayaasha sharci-dejintu ansixiyaan, Madaxweynuhuna saxeexo.


Cabdiraxmaan Maxamed C/laahi (Cirro)
Guddoomiyaha Golaha Wakiiladda JSL


C/rasaaq Siciid Ayaanle
Xoghayaha Guud ee Golaha Wakiiladda

